

百子金書





国防大学 2 073 0971 3

百子全書

浙江人民出版社



陰符經

漢 張良注

上篇

觀天之道。執天之行。盡矣。故天有五賊。見之者昌。

太公曰。其一賊命。其次賊物。其次賊時。其次賊功。其次賊神。賊命以一消。天下用之以味。賊物以一急。天下用之以利。賊時以一信。天下用之以反。賊功以一恩。天下用之以怨。賊神以一驗。天下用之以小大。鬼谷子曰。天之五賊。莫若賊神。此大而彼小。以小而取大。天地莫之能神。而況于人乎。筌曰。黃帝得賊命之機。白日上昇。殷周得賊神之驗。以小滅大。管仲得賊時之信。九合諸侯。范蠡得賊物之急。而霸南越。張良得賊功之恩。而敗強楚。

五賊在心。施行於天。宇宙在乎手。萬化生乎身。

太公曰。聖人謂之五賊。天下謂之五德。人食五味而生。食五味而死。無有怨而棄之者也。心之所味也。亦然。鬼谷子曰。賊命可以長生不死。黃帝以少女精感之。時物亦然。且經冬之草。覆之而不死。露之即見傷。草木植性。尚猶如此。況人萬物之靈。其機則少女以時。廣成子曰。以為積火焚五毒。五毒即五味。五味盡可以長生也。筌曰。人因五味而生。五味而死。五味各有所主。順之則相生。逆之則相勝。久之則精氣薰蒸。人腐五臟。殆至滅亡。後人所以不能終其天年者。以其生生之厚矣。是以至道淡然。胎息先味。神仙之術百數。其要在抱一守中。

少女之術百數。其要在還精採炁金丹之術百數。其要在神水華池。治國之術百數。其要在清淨自化。用兵之術百數。其要在奇正權謀。此五事者。卷之藏于心。隱于神。施之彌于天。給于地。宇宙瞬息。可在人之手。萬物榮枯。可生人之身。黃帝得之。先固三宮。後治萬國。鼎成而馭龍上昇于天也。

天性人也。人心。機也。立天之道。以定人也。

亮曰。以為立天定人。其在于五賊。

天發殺機。龍蛇起陸。人發殺機。天地反覆。

范曰。昔伊尹佐殷。發天殺之機。克夏之命。盡而事應之。故有東征西夷怨。南征北狄怨。太公曰。不耕。三年大旱。不鑿。十年地壞。殺人過萬。大風暴起。亮曰。按楚殺漢兵數萬。大風杳冥。晝晦。有若天地反覆。

天人合發。萬變定基。

良曰。從此一信而萬信生。故為萬變定基矣。筌曰。大荒大亂。兵水旱蝗。是天殺機也。虞舜陶甄夏禹拯骸。殷鑿夏臺。周因姜里。漢祖亭長。魏武乞丐。俱非王者之位。乘天殺之機也。起陸而帝。君子在野。小人在位。權臣擅威。百姓思亂。人殺機也。成湯放桀。周武伐紂。項籍斬贏嬰。魏廢劉協。是乘人殺之機也。覆貴為賤。反賤為貴。有若天地反覆。天人之機。合發成敗之理。宜然。萬變千化。聖人因之而定基業也。

性有巧拙。可以伏藏。

良曰。聖人見其巧拙。彼此不利者。其計在心。彼此利者。聖哲英雄。道焉。況用兵之務哉。筌曰。中慾不出。謂之啟。外邪不入。謂之閑。內啟是其機也。難知如陰。不動如山。巧拙之性。使人無間而得窺也。

九竅之邪。在乎三要。可以動靜。

太公曰。三要者。耳目口也。耳可鑿而塞。目可穿而眩。口可利而訥。興師動衆。萬夫莫議其竒。在三者。或可動。或可靜之。筌曰。兩葉掩目。不見泰山。雙豆塞耳。不聞雷霆。一舌掠舌。不能立言。九竅皆邪。不足以察機變。其在三者。神心志也。機動未朕。神以隨之。機兆將成。心以圖之。機發事行。志以斷之。其機動也。與陽同其波。五獄不能鎮其隅。四清不能界其維。其機靜也。與陰同其德。智士不能運其榮。深聞不能窺其謀。天地不能奪其時。而況于人乎。

火生於木。禍發必烈。奸生于國。時動必泄。知之修鍊。謂之聖人。

筌曰。火生於木。火發而木焚。奸生于國。奸成而國滅。木中藏火。火始于無形。國中藏奸。奸始于無象。非至聖不能修身鍊行。使奸火之不發。天國有無軍之兵。無災之禍矣。以箕子逃而縛。襄牧。商容囚而蹇叔哭。

中篇

天生天殺。道之理也。

良曰。機出乎心。如天之生。如天之殺。則生者自謂得其生。死者自謂得其死。

天地萬物之盜。萬物人之盜。人萬物之盜。三盜既宜。三才既安。

鬼谷子曰。三盜者。彼此不覺知。但謂之神。明此三者。況車馬金帛。棄之可以傾河填海。移山覆地。非命而動。然後應之。筌曰。天地與萬物生成。盜萬物以衰老。萬物與人之服御。盜人以驕奢。人與萬物之上器。盜萬物以毀敗。皆自然而往。三盜各得其宜。三才遞安其任。

故曰。食其時。百骸理。動其機。萬化安。

鬼谷子曰。不欲令後代人君。廣斂珍寶。委積金帛。若能棄之。雖傾河填海。未足難也。食者所以治百骸。失其時而生百骸。動者所以安萬物。失其機而傷萬物。故曰。時之至間。不容瞬息。先之則太過。後之則不及。是以賢者守時。不肖者守命也。

人知其神之神。不知不神之所以神也。

筌曰。人皆有聖人。不貴聖人之愚。既睹其聖。又察其愚。復觀其聖。故書曰。專用聰明。則事不成。專用晦昧。則事皆悖。一明一晦。衆之所蔽。伊尹酒保。太公屠牛。管仲作革。百里奚賣粥。當衰亂之時。人皆謂之不神。及乎逢成湯。遭文王。過齊桓。值秦穆。道濟生靈。功格宇宙。人皆謂之至神。

日月有數。大小有定。聖功生焉。神明出焉。

鬼谷子曰。後代伏思之。則明天地不足貴。而況于人乎。筌曰。一歲三百六十五日。日之有數。

月次十二。以積閏大小。餘分有定。皆稟精炁。自有。不為聖功神明而生。聖功神明。亦稟精炁。自有。不為日月而生。是故成不貴乎天地。敗不怨乎陰陽。

其盜機也。天下莫能見。莫能知。君子得之固躬。小人得之輕命。

諸葛亮曰。天子太公。豈不賢於孫吳韓白。所以君子小人異之。四子之勇。至于殺身。固不得其主而見殺矣。筌曰。季主凌夷。天下莫見凌夷之機。而莫能知凌夷之源。霸王開國之機。而莫能知開國之機。而莫能知開國之源。君子得其機。應天順人。乃固其躬。小人得其機。煩兵黷武。乃輕其命。易曰。君子見機而作。不俟終日。又曰。知機其神乎。機者易見而難知。見近知遠。

下篇

瞽者善聽。聾者善視。絕利一源。用師十倍。三反晝夜。用師萬倍。

尹曰。思之精。所以盡其微。良曰。後代伏思之。耳目之利。絕其一源。筌曰。人之耳目。皆分于心。而竟于神。心分則機不精。神竟則機不微。是以師曠薰目而聰耳。離朱漆耳而明目。任一源之利。而反用師于心。舉事發機。十全成也。退思三反。經晝歷夜。思而後行。舉事發機。萬全成也。太公曰。目動而心應之。見可則行。見否則止。

心生於物。死於物。機在於目。

筌曰。為天下機者。莫近乎心目。目能發目。目能見機。秦始皇東游會稽。項羽目見其機。心生

于物。謂項良曰。彼可取而代之。晉師畢。至於淮淝。苻堅目見其機。心死于物。謂苻融曰。彼初
敵也。胡為少耶。則知生死之心在乎物。成敗之機見於目焉。

天之無恩。而大恩生。迅雷烈風。莫不蠢然。

良曰。熙熙哉。太公曰。誠懼致福。筌曰。天心無恩。萬物有心。歸恩於天。老子曰。天地不仁。以萬
物為芻狗。聖人不仁。以百姓為芻狗。是以施而不求其報。生而不有其功。及至迅雷烈風。威
遠而懼過。萬物蠢然而懷懼。天無威而懼萬物。萬物有懼而歸威於天。聖人行賞也。無恩於
有功。行伐也。無威於有罪。故賞罰自立於上。感恩自行于下也。

至樂性餘。至靜性廣。

良曰。天機在於是也。筌曰。樂則奢餘。靜則貞廉。性餘則神濁。性廉則神清。神者智之泉。神清
則智明。智者心之府。智公則心平。人莫鑒於流水。而鑒於澄水。以其清且平。神清意平。乃能
形物之情。夫聖人者。不淫於至樂。不安於至靜。能棲神靜樂之間。謂之守中。如此。施利不能
誘。聲色不能蕩。辯士不能說。智者不能動。勇者不能懼。見禍于重開之外。慮患于杳冥之內。
天且不違。而況于兵之詭道者哉。

天之至私。用之至公。

尹曰。治極微。良曰。其機善。雖不令天下而行之。天下所不能知。天下所不能違。筌曰。天道曲
成萬物而不遺。椿菌鵬鷁。巨細修短。各得其所。至私也。雲行雨施。雷電霜雹。生殺之均。至公

也。聖人則天法地。養萬民。察勞苦。至私也。行正令。施法象。至公也。孫武曰。視卒如愛子。可以俱死。視卒如嬰兒。可與之赴深溪。愛而不能令。譬若驕子。是故令之以文。齊之以武。禽之制在焉。

太公曰。豈以小大而相制哉。尹曰。炁者天之機。釜曰。玄龜食蟬。鷄隼擊鷦。黃腰啖虎。飛鼠斷猿。蛭螭齧魚。狼狽噬鶴。餘甘柔金。河車服之。無窮化玉。碓黃變鐵。有不灰之木。浮水之石。夫禽獸木石得其炁。尚能以小制大。况英雄得其炁。而不能淨寰海而御宇宙也。

生者死之根。死者生之根。恩生于害。害生于恩。太公曰。損己者物愛之。厚己者物薄之。釜曰。謀生者必先死。而後生。習死者必先死。而後死。鷄冠子曰。不死不生。不斷不滅。孫武曰。投之死地而後生。致之亡地而後存。吳起曰。兵戰之場。立死之地。必死則生。幸生則死。恩者害之源。害者恩之源。吳樹恩于越。而害生。周立害于殷。而恩生。死之與生也。恩之與害相反。紮纏也。

愚人以天地文理聖。我以時物文理哲。

太公曰。觀鳥獸之時。察萬物之變。釜曰。景星見。黃龍下。翔鳳至。醴泉出。嘉穀生。河不滿溢。海不揚波。日月薄蝕。五星失行。四時相錯。晝冥宵光。山崩川涸。冬雷夏霜。愚人以此天地文理。為理亂之機。文思安安。光被四表。克明俊德。以親九族。六府三事。無相奪倫。百穀用成。兆民用康。昏主邪臣。法令不一。重賦苛政。上下相蒙。懿戚貴臣。驕奢淫縱。酣酒嗜音。峻宇雕牆。百

姓流亡。思亂怨上。我以此時物文理。為理亂之機也。

人以愚虞聖。我以不愚虞聖。人以奇期聖。我以不奇期聖。

筌曰。賢哲之心。深妙難測。由巢之跡。人或窺之。至於應變無方。自機轉而不窮之智。人豈虞之以跡度心。乃為愚者也。

故曰。沉水入火。自取滅亡。

良曰。理人自死。理軍亡兵。無死則無不死。無生則無不生。故知乎死生。國家安寧。

自然之道靜。故天地萬物生。

尹曰。靜之至。不知所以生。

天地之道浸。故陰陽騰。

良曰。天地之道。浸微而推勝之。

陰陽相推。而變化順矣。

良曰。陰陽相推。激至於變化。在于目。

是故聖人知自然之道。不可違。因而制之。

良曰。大人見之為自然。英哲見之為制。愚者見之為化。尹曰。知自然之道。萬物不能違。故利而行之。

至靜之道。律歷所不能契。

良曰。觀鳥獸之時。察萬物之變。鳥獸至。淨律歷所不能契。從而機之。

爰有奇器。是生萬象。八卦甲子。神機鬼藏。

良曰。六爻為天藏。可以伏藏也。

陰陽相勝之術。昭昭乎進乎象矣。


亮曰。奇器者。聖智也。天垂象。聖人則之。推甲子。畫八卦。考稽律歷。則鬼神之情。陰陽之理。昭著乎象。無不盡矣。亮曰。八卦之象。申而用之。六十甲子。轉而用之。神出鬼入。萬明一矣。良曰。萬生萬象者。心也。合藏陰陽之術。日月之數。昭昭乎在人心矣。唐成子曰。甲子合陽九之數也。卦象出師衆之法。出師以律。動合鬼神。順天應時。而用鬼神之道也。

陰符經終

關尹子序

關令尹喜周大夫也老子西遊喜望見有紫氣浮關知真人當過候物色而迹之果得老子老子亦知其奇為著書喜既得老子書亦自著書九篇名關尹子今陝州靈寶縣太初觀乃古函谷關候見老子處終南宗聖宮乃關尹故宅周穆王修其草樓改號樓觀建老子祠道觀之興實祖於此老子授經後西出大散關復會于成都青羊肆賜號天始先生即莊子所謂博大真人者也

洪體存高文之質偶好松喬之壽知道之士雖微賤必親也雖夷狄必賢也後遇鄭君思遠鄭君多玉及瓊司之書服餌開我以至道之良藥呼吸洗我以紫清之上味後屬洪以尹真人文始經九篇洪愛之誦之藏之拜之字者道也柱者建天地也極者尊聖人也符者精神魂魄也鑑者心也匕者食也釜者化也籌者物也藥者謀治也洪每味之泠泠然若躡飛葉而游乎天地之混冥茫茫乎若履橫杖而浮乎大海之渺漠超若處金碧琳琅之居森若握鬼神之印條若飄鸞鶴怒若闢虎兕清若浴碧慘若夢紅擒縱大道渾淪之理方士不能到先儒未嘗言可仰而不可攀可玩而不可執可鑒而不可思可符而不可言其忘物遺世者之所言乎其絕迹去智者之所言乎其同陰陽而冥彼此者之所言乎何如此之尊高何如此之廣大又何如此之簡易也洪也幸親受之丹陽葛洪稚川叙



關尹子

一字字者道也

非有道不可言。不可言即道。非有道不可思。不可思即道。天物怒流。人事錯錯然。若若乎回也。夏夏乎闕也。勿勿乎似而非也。而爭之。而介之。而覘之。而嘖之。而去之。而要之。言之如吹影。思之如鑠塵。聖智造迷。鬼神不識。唯不可為。不可致。不可測。不可分。故曰天曰命。曰神曰玄。合曰道。

無一物非天。無一物非命。無一物非神。無一物非玄。物既如此。人豈不然。人皆可曰天。人皆可曰神。人皆可致命造玄。不可彼天此非天。彼神此非神。彼命此非命。彼玄此非玄。是以善吾道者。即一物中。知天盡神。致命造玄。學之。徇異名。析同實。得之。契同實。忘異名。

觀道者如觀水。以觀沿為未足。則之河之江之海。曰水至也。殊不知我之津液涎淚皆水。

道無人。聖人不見。甲是道。乙非道。道無我。聖人不見。己進道。己退道。以不有道。故不無道。以不得道。故不失道。

不知道妄意卜者。如射覆孟高之者。曰存金存玉。中之者。曰存角存羽。卑之者。曰存瓦存石。是乎非是乎。唯置物者知之。

一陶能作萬器。終無有一器能作陶者。能害陶者。一道能作萬物。終無有一物能作道者。能害道者。道茫茫而無知乎。心儻儻而無羈乎。物迷迷而無非乎。電之逸乎。沙之飛乎。聖人以知心。

一物一道。三者又合為一。不以一格不一。不以不一害一。

以盆為沼。以石為島。魚環游之。不知幾千萬里而不窮乎。天何故水無源無歸。聖人之道本無首末無尾。所以應物不窮。

無愛道。愛者水也。無觀道。觀者火也。無逐道。逐者水也。無言道。言者金也。無思道。思者土也。唯聖人不離本情而登大道。心既未萌。道亦假之。

重雲蔽天。江湖黯然。游魚茫然。欲望波明。食動。幸賜于天。即而就之。魚釣斃焉。不知我無我而逐道者亦然。

方術之在天下多矣。或尚晦或尚明。或尚強或尚弱。執之皆事。不執之皆道。

道終不可得。彼可得者。名德不名道。道終不可行。彼可行者。名行不名道。聖人以可得可行者。所以善吾生。以不可得不可行者。所以善吾死。

聞道之後。有所為有所執者。所以之人。無所為無所執者。所以之天。為者必敗。執者必失。故聞道於朝。可死於夕。

一情冥為聖人。一情善為賢人。一情惡為小人。一情冥者。自有之無。不可得而示。一情善惡者。自無起有。不可得而秘。一情善惡為有知。唯動物有之。一情冥為無知。溥天之下。道無不在。

勿以聖人力行不急。則曰道以勤成。勿以聖人堅守不易。則曰道以執得。聖人力行。猶之發矢。因彼而行。我不自行。聖人堅守。猶之握矢。因彼而守。我不自守。

若以言行學識求道。互相輾轉。無有得時。知言如泉鳴。知行如禽飛。知學如擲影。知識如計夢。一息不存。道將來契。以事建物則難。以道棄物則易。天下之物。無不成之難。壞之易。

一灼之火。能燒萬物。物亡而火何存。一息之道。能冥萬物。物亡而道何在。

人生在世。有生一日死者。有生十年死者。有生百年死者。一日死者。如一息得道。十年百年死者。如歷久得道。彼未死者。雖動作昭智。止名為生。不名為死。彼未契道者。雖動作昭智。止名為事。不名為道。

不知吾道。無言無行。而即有言有行者。求道。忽遇異物。橫執為道。殊不知捨源求流。無時得源。捨本求末。無時得本。習射習御。習琴習奕。終無一事。可以一息得者。唯道無形無方。故可得之一息。

兩人射。相遇則工拙見。兩人奕。相遇則勝負見。兩人道。相遇則無可示。無可示者。無工無拙。無勝無負。

吾道如海。有億萬金投之。不見。有億萬石投之。不見。有億萬污穢投之。不見。能運小鰕小魚。能運大鯤大鯨。合衆水而受之。不為有餘。散衆水而分之。不為不足。

吾道如處暗。夫處明者。不見暗中一物。而處暗者。能見明中區事。

小人之權。歸於惡。君子之權。歸於善。聖人之權。歸于無所得。唯無所得。所以為道。吾道如劍。以刃割物。即利。以手握刃。即傷。